

Qaanaami kulturimik toqqammaveqartumik immikkullarissumillu piniariaatsit kin-guaariinnut aggersunut iluaqtissatut qanoq ililluta tammatsaolineqarnissaannik qulak-keerinnissinnaanerput pillugu apeqquteqaat aallaavigalugu oqallinnissamik siun-nersuut.

(Inatsisartunut ilaasortaq, Mikivsuk Thomassen, Inuit Ataqatigiit)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aallarniutigalugu siunnersuuteqartoq Inatsisartunut ilaasortaq Mikivsuk Thomassen, Inuit Ataqatigiit, Qaanaami piniariaatsit immikkullarissut oqallisigineqartussangortimmagit qujassuteqarfingissavara. Suliap maani Inatsisartuni oqallisigineqarnissaa qilanaaraara. Kalaallit Nunaanni ileqqutoqqat malillugit suli piniariaaseqarnerput aammalu nunatsinni innuttaasunit tamanit iluaqtigineqartunik nutaaliaalluinnartunik atortoqarlatalu sakkoqarnerput neriu-punga suleqatigiilluta eqqarsaatersuutigisinnaassagippu.

Naalakkersuisut pisuussutit uummassisillit piujuartitsineq allaavigalugu atorneqartarnissaat pillugu naalakkersuisooqatigiinnissamik isumaqatigiisummi allassimasut naapertorlugit il-loqarfiit nunaqarfiillu ataasiakkaat kisiisa aallaaviginagit Kalaallit Nunaalli tamakkerlugu sul-liissippi.

Naalakkersuisut pisuussutinik uummassisilinnik naleqqussaanermik aallaaveqarlutik aqutsip-put pinngortitamullu tunngatillugu silap pissusaata allanngornerinut tunngasut isiginiagaralu-git. Silap pissusaata allanngorneri piniariaatsitsinnik atortunillu atuinitssinnik aammalumi inu-ussutissarsiut tamarmiusoq isigalugu pissutsinik allanngortitsippu.

Ukiumiit ukiumut ukiup qanoq ilinerani pissutsit allanngorarsinnaasarput, pissutsillu taamaan-nerisa piniarnermi atugassaritat piniagassallu tikinniarsinnaaneri siumut naatsorsorne-qarsinnaaneq ajorlutik. Tamatuma kingunerisaanik uumasunut miluumasunut imarmiunut ta-manut tunngatillugu pisassanik nuutsisinnaanermut periutsimik Naalakkersuisut atuilersimap-put. Taamaasiornikkut ukiumut piniarfiusussami aalajangersimasumi pisassiissutit pisarineqan-ningitsoortut annertutillugit pisassanik ukiumut piniarfiusussamut tullermut nuutsisinnaaneq qulakkeerneqarpoq atuinngitsoornerlu taamaasilluni pinngitsoortinneqarluni.

Piniarnermut aallaaniarnermullu inatsimmi ileqqutoqqat malillugit piniariaatsit taakkulu atta-tuarnissaasa ilanngunneqarsimanginneri siunnersuuteqartup innersuussutigai. Pineqartumulli tunngatillugu erseqqissaatigerusuppara Piniarneq aallaaniarnerlu pillugit inatsimmi § 8, imm. 7-imi ima allassimasoqarmat: "*Piniutit, piniarnermi atortut taakkulu pisataasa ilusilersorneri atorneqartarnerilu, tamatumunnga ilanngullugu angallatit imarsiutit/nunakkoorutit, piniutit, aallaasit imassaat piniariaatsilluunniit aalajangersimasut atorneqartarnerinut inerteqqutit*" allassimasullu taakku atuummata taakkulu nalunaarutinik kommunillu ileqqoreqqusassaanik

ataasiakkaanik ilusilersuinermi atorneqartarmata. Paragrafi taanna malillugu piniarnermi atortut qangaaniit atorneqartartut aalajangersimasut atorneqarsinnaaneri aalajangersarneqarsinnaapput. Tamatuma saniatigut piniarnermi atortut nutaaliat aalajangersimasut atorneqarsinnaaneri akuerineqarsinnaapput, inerteqqutigineqarsinnaapput killilorsorneqarsinnaallutilluuniit. Paragrafi taanna uumasunut miluumasunut imarmiunut nunamiunullu snescooterit atorlugit piniaqquusaangitsut amerlanersaanut tunngatillugu nalunaarutit aqqutigalugit malittarisasiornermi atorneqartarportaaq.

Ineriartornerup ilaattut snescooterit atorlugit piniartarneq kissaatiginanngeqaaq uumasunik miluumasunik annertuumik akornusersuisarmata. Tamatuma saniatigut pinngortitami immikkullarissumi eriagerusutatsinnilu annertuumik nipiliortarput. Snescooterit ATV-llu pinngortitami mingutsisisinnaapputtaaq taamaasillutilu uumasut neriniarfianik imerfigisartagaannilu pitsaanngitsumik sunniuteqarsinnaallutik.

Ukiuni kingullerni snescooterit piniarnermut pingaartumik nannunniarnermi atorneqartarneri annertusiartorsimavoq. Taamatut ineriartortoqarnera aaqqiiffigerusuppara. Tamakkuningga piniuteqartarnerup nuna tamakkerlugu annertunerusumik siunertaqarluartumillu nakkutigineqarnissaa kissaatiginarpoq. Taamaasiortoqassappat kommunit pisariaqartinneqartunik soorlu qamutit motoorillit tamakku ingerlaartarfissaanik pilersitsiniallutik malittarisassiornermikkut akisussaaqataanerunissaat pisariaqarpoq.

Snescooterit ATV-llu amerliartorneri kiisalu umiatsiat angallatillu amerliartorneri, allgaluttuinnarneri sukkatsikkaluttuinnarnerilu maluginiarsimavakka. Soorlutaaq angallatit piniarnermut aalisarnermullu atatillugu inuussutissarsiutitut atorneqartartut assigiinngitsut amerlasuut pissarsiarineqarsinnaalersimasut. Tassunga atatillugu pisuussutinik uumassusilinnik atuinitta piujuartitsinermik aallaaveqarluni ingerlanneqarnissaa aammalu piniakkanik toqtseriaatsitta isumannaatsuunerpaamik pisarnissaa pingaaruteqarpoq.

Qangaaniit piniariaatsit immikkullarissut attatiinnarneqassappata pineqartup najugaqartunit tapersorsorneqarnissaa pinngitsoorneqarsinnaanngilaq. Inuaqatigiit ingerlariaqqiffissatut kissaataat qulaajarneqartariaqarput. Ileqqutoqqat malillugit piniariaatsit atorneqartut attatiinnarneqarusuppat nukitorsarlugillu. Imaluunniit aalisarnermi piniarnermilu periutsit atortullu nutaat nunatsinni najukkani allani annertusiartuinnartumik atorneqaleriartortut atorneqale-rusuppat. Qimuttut qaannallu atorlugit piniariaatsit attatiinnarnissaat kissaatigineqarpa imaluunniit atortut nutaaliaasut soorlu umiatsiat, snescooterit kiisalu ATV-it atornerullugit inger-latsisoqarusuppa?

Naalakkersuisut oqimaaqatigiissumik aaqqiisoqarnissaa kissaatigaat, tassalu piniariaasitoqqat atortullu nutaaliaasut atorlugit piniariaatsit nutaat atorneqarsinnaanissaat ammaffigalugit.

Pisuussuit uumassusillit piujuartitsineq aallaavigalugu piniartarnerisigut ileqqutoqqat malillugit piniariaatsit meeqqatsinnut ernuttatsinnullu ingerlateeqqissinnaanissaat qulakkiissavarput. Ileqqutoqqat kinguaariinnut tullernut ingerlateeqqiiinnarnagpit piniariaatsit pinngortitamut piniag-assanullu mianerinnittut attatiinnarsinnaassavagut.

Nunarput tamakkerlugu, soorluttaaq Avanersuarmi, ileqqutoqqat malillugit piniartutut inuunerup ingerlaannarnissaa patajaallisarnissaalu Naalakkersuisut ilutigalugu kissaatigaat. Naalakkersuisulli nunatsinni tamarmi ineriaartorneq erseqqissaatigerusuppaat, tassalu piniartut amerliartuinnartut aalisarnermiik inuussutissarsiuqebarnermut ikaarsaartalernerat. Ineriaartorneq nuannaarutissaasoq. Erseqqissaatitut oqaatigissavara Avanersuarmi piniartut amerlassusaat ukiuni kingullerni 10-ni allanngungaarsimanngimmata. Qaanaami inuussutissarsiuutigalugu piniartutut allagartallit 2009-mut sanilliullugu 2018-imi 42%-imik amerleriarsimaneri Naalakkersuisut maluginiarpaat.

Silap kissatsikkiartornerata kingunerisaanik nunatta avannarpasinnerusortaani qimussit atorluguq piniarnermi atugassarititat allanngorsimaneri Naalakkersuisuttaaq arajutsisimanngilaat. Tammanna sikuusarnerata sivikinnerulersimaneratigut taamaasillunilu sikumit aalisartarnerit piniartarnerillu piffissami sivikinnerusumi ingerlanneqartalersimaneratigut takuneqarsinnaavoq. Pissutsit taamaanneri nannunniartarnernut, aaffanniartarnernut, qilalugarniartarnernut puisinniartarnernullu sunniuteqarsimavortaaq.

Tamatuma saniatigut Qaanaami qimmit qimuttut annertuumik ikiliartorput. Qimmit qimuttut 1990-imi 1800-usimapput massakkullu qimmit nalunaarsukkat naapertorlugit 518-iullutik.

Ileqquqqat malillugit piniariaatsit atortullu siunissami kingulissatsinnut kulturikkut kingornussat tammatasaalineqarnissaat aamma qulakkeerneqarnissaat oqaluttuarisaanerup illuatungaaniippoq tamannalu attatiinnartariaqarparput uppernarsarsinnaasariaqarlutigulu. Taamaat tumik katersugaasiveqarneq pillugu inatsimmi kingornussat tigussaanngitsut pillugit maleruagassat innersuussutigerusuppakka, ilisimatitsissutigalugulu Nunatta Katersugaasivia Allagaateqarfialu (NKA) attavigineqarsinnaasoq ileqquqqat malillugit piniariaatsit atortullu NKA-p kingornussat tigussaanngitsut allattorsimaffiannut ilanngunneqarsinnaanerat pillugu oqaloqatiginninnissaq siunertalarugu. Katersugaasiveqarneq pillugu inatsisip siunertarai Kalaallit Nunaata kingornussaasa tigussaasut tigussaanngitsullu qulakkeerneqarnissaat Kalaallit Nunaannilu katersugaasiveqarnikkut sulinerup suleqatigiinnerullu siuarsarnejarnissaa.

Naalakkersuisut taamatut oqaaseqarlutik apeqquteqaat aallaavigalugu oqallinnissamut mas-sakkut pisussamut qilanaarput.